

Urtarrilaren 6aren ondorengo igandean  
**JAUNAREN BATAIOA (C)**

**Otoitza**

Jainko ahalguztidun betierekoa,  
 Kristo Jordango uretan bataiatua izan zenean  
 eta Espiritu Santua Haren gainera jaitsi zenean,  
 goraki aitortu zenuen Bera dela zure Seme maitea;  
 emaezu,  
 uretik eta Espiritu Santuagandik jaio diren zure semetzakoei,  
 zeure nahia betetzen irautea.  
 Zure Seme Jesu Kristo.

Edota:

Jainko Jauna, zure Semea gizon eginik agertu zitzaigun;  
 egizu, gizatasunean gure antzeko egin zenak  
 barrutik Beraren antzeko egin gaitzala.  
 Zurekin eta Espiritu Santuarekin.

I. IRAKURGAIA: Is 42, 1-4. 6-7

*Hona, nire zerbitzaria,  
 atsegin zaidan nire aukeratua.*

Isaias Profetaren liburitik

Honela mintzo da Jauna:  
 «Hona, Nik eusten diodan nire zerbitzaria,  
 atsegin zaidan nire aukeratua.  
 Honengan ipini dut nire espiritua:  
 berak ekarriko die zuzenbidea atzerriei.  
 Ez da deiadarka ariko, ez du oihuka hitzegingo,  
 ez du kaleetan entzun eraziko bere mintzoa.  
 Kainabera pitzatua ez du hautsiko,  
 doi-doi biztua dagoen metxa ez du itzaliko.  
 Zuzenbidea ekarriko du;  
 ez du etsiko, ez da hautsiko,  
 zuzenbidea lurrean ezarri arte,  
 uharteek itxaron duten Haren legea jarri arte.  
 Nik, Jaunak, zuzentasunez dei egin dizut,  
 eskutik hartu zaitut;  
 herri baten elkargo izateko,  
 atzerrien argi izateko aukeratu zaitut,  
 itsuen begiak zabal ditzazun,  
 giltzapetuak espetxetik atera,  
 eta gartzelako ilunbetan daudenak aska ditzazun».

ERANTZUN SALMOA: Sal 28, 1-2. 3ac-4. 3b eta 9c-10

R/. **Bere herria bedeinkatuko du  
bake emanez Jaunak.**

Eman, Jainko seme-alabok, Jaunari,  
eman ospe eta indar Jaunari.  
Eman ospe Jaunari bere izenaren ederrez,  
jauretsi Jauna apainduri deunez. R/.

Horra Jaunaren mintzoa ur gainean,  
Jauna ur ugarien gainean.  
Jaunaren mintzoa indartsu,  
Jaunaren mintzoa ospetsu. R/.

Jainko itzalgarriaren hostotsa durundan,  
Haren jauretxean denek diote: Gora!  
Eresi da Jauna uholde gainean,  
Jauna errege eseriko betierean. R/.

II. IRAKURGAIA: Ap Eg 10, 34-38

*Jaungoikoak Espiritu Santuaren indarrez  
gantzutu zuen Jesus.*

Apostoluen Eginetatik

Egun haietan, Pedrok honela esan zuen: «Garbi ikusten ari naiz, Jaungoikoak ez duela bereizkeriarik egiten; baizik eta onartzen duela, Haren beldur dena eta zuzen dabilena, edozein herritakoa dela ere. Berak bidali zien Israelgo seme-alabei bere hitza, eta guztien Jauna den Jesu Kristok ekarriko zuen bakearen berri ona eman zien.

Badakizue zer gertatu zen, Galileatik hasi eta Judea osoan, Joanek erakutsitako bataio ondoren: Nazareteko Jesusena, alegia, Jaungoikoak Espiritu Santuaren indarrez gantzutua; eta on egiten eta deabruak hartutako guztiak sendatzen igaro zena: Jaungoikoa Harekin baitzegoen».

EBANJELIOA: Lk 3, 15-16. 21-22

**Aleluia:** Ik. Mk 9, 6

R/. Aleluia.

V/. Zerua zabaldu zen eta Aitaren ahotsa entzun zen:  
«Hau da nire Semea, nire Maitea.  
Entzuiozue». R/.

*Jesus ere bataiatu egin zen.  
Eta otoitzean ari zela, zerua zabaldu zen.*

Jesu Kristoren Ebanjelioa San Lukasen liburutik

Aldi hartan, herria kezkatzen zegoen, eta beren baitan galdezka, Joan hu

Joanek honela erantzun zien guztiei: «Nik urez bataiatzen zaituztet; baina badator ni baino ahaltsuago dena, ni ez bainaiz inor Haren oinetakoen lokarriak askatzeko. Hark Espiritu Santuaz eta suz bataiatuko zaituzte».

Herri guztia bataiatzen ari zen batean, Jesus ere bataiatu egin zen. Eta otoitzean ari zela, zerua zabaldu zen, eta Espiritu Santua jaitsi zitzaion gainera uso irudian. Eta zeruko mintzo batek honela esaten zuen: «Zu zara nire Semea, nire Maitea; Zuregan dut neure atsegina».

### **Oparigaien gainekoa**

Onar, Jauna, gure dohain hauek,  
zeure Seme maitea agertu diguzun egun honetan;  
eta iguzu, zure zerbitzarien eskaintza hau  
munduko bekatua garbitu zuenaren opari egin dadila.  
Jesu Kristo.

**Prefazioa:** *Jesusen misterioaren agerpena Jordan ibaian.*

V/. Jauna zuekin.  
R/. **Eta zure espirituarekin.**  
V/. Gora bihotzak.  
R/. **Jaunagan dauzkagu.**  
V/. Eskerrak Jaungoiko gure Jaunari.  
R/. **Egoki da eta zuzen.**

Egoki da, bai, eta zuzen  
nonnahi eta beti Zuri eskerrak ematea,  
Jauna, Aita guztiz santu,  
Jaungoiko ahalguztidun betiereko Horri.

Seinale miragarriz ezagutarazi duzu gaur  
Jordan ibaiko Bataio berria;  
zerutik jaitsitako hitzak jakin erazi du  
zure Hitza gizakien artean dagoela;  
eta Espiritu Santuak, uso itxuran agertuz, adierazi digu  
Jesus, zure zerbitzaria, dela Mesias,  
behartsuei berri ona ekartzera bidalia.

Horregatik, zeruko talde guztiekin,  
lurrean beti eta beti goresten zaitugu,  
Zuri, Jainko guztiz haundi Horri,  
etengabe [esanez] kantatuz:

Santu, Santu, Santua...

### **Jaunartze ondorengoa**

Dohain santu hauez aserik, Jauna,  
zure errukiari dei egiten diogu:  
egin gaitzazu zeure Semearen hitzaren entzule zintzo,  
izenez eta izatez zure seme-alaba izan gaitezen.

Jesu Kristo.